



CENTRALE BANK VAN ARUBA

COMUNICADO DI PRENSA

Banco Central di Aruba ta lamenta e recien noticianan eroneo den prensa Hulandes tocante di e entidadnan di Ennia Aruba

Banco Central di Aruba (BCA) a tuma nota di e noticianan publica den “Financieele Dagblad” y “NRC” relata na Ennia y ta lamenta profundamente cu ta sugeri cu e entidadnan di Ennia Aruba lo ta den problema y cu Aruba lo mester fia placa for di gobierno Hulandes pa por proteha e aseguradonan di e entidadnan Ennia Aruba.

E carta fecha 25 di augustus 2023 di e secretario di estado A. van Huffelen na “Tweede Kamer” ta muestra claramente cu e problematica di Ennia no ta relata na Aruba ni na e entidadnan Ennia Aruba. Ta sumamente di condena cu e autornan di e articulonan aki no a haci esfuerso di tuma nota di e contenido di e carta aki.

Aunke cu BCA pa rasonnan di confidencialidad no por divulga informacion tocante Ennia Aruba, e ta haya importante pa informa publico cu e entidadnan di Ennia Aruba ta sano, considerando e cuentanan anual di 2022 di Ennia Aruba publica ariba su website y certifica pa un oficina di auditoria. Ennia Aruba ta forma parti di e grupo di Ennia, pero e entidadnan di Ennia Aruba ta solvabel y rendabel y ta cumpli cu tur e exigencianan prudencial manera rekeri pa ley y BCA.

Ademas BCA ta remarca cu locual a tuma lugar na e entidadnan di Ennia na Corsow lo no por tuma lugar aki na Aruba. BCA ta un supervisor estricto y no ta tolera. Den situacionnan di violacionnan di ley y regulacionnan grave, inmediatamente ta tuma accion di medida. Ya desde 2007, mirando señalnan di transaccionnan entre partidonan liga na otro den cual Centrale Bank van Curaçao en Sint Maarten (CBCS) no a tuma accion al respecto, BCA a dicidi cu mester independisa e surcursalnan Arubano. Consecuentemente, e entidadnan na Aruba a haya nan propio capital y maneho y desde e tempo ey ta cay bou di e supervision directo y estricto di BCA.

Resumiendo ta di lamenta y condena cu ta involucra Aruba y e entidadnan di Ennia Aruba incorrectamente den noticianan di e dicho corantnan Hulandes.

Oranjestad, 8 di september 2023